



par sa mort ignominieuse celle de son  
 predecesseur Alexis. Il estoit fils d'I-  
 saac Comnene, frere de l'Empereur  
 Iean Comnene surnommé le Beau.  
 La premiere chose qu'il fit après s'estre  
 emparé de l'Empire, fut d'épouser par  
 force Agnés, qui estoit fiancée à Ale-  
 xis, & estoit âgée d'onze à douze ans.  
 Pendant la domination de ce dernier,  
 les Perles avoient pris la ville de Ni-  
 cée, & plusieurs autres qui ne leur  
 avoient fait aucune resistance: mais  
 Andronic ayant repris cette premiere  
 ville, il en fit cruellement mourir la  
 pluspart des habitans, à cause que  
 comme il l'assiegeoit, ils estoient ve-  
 nus sur les remparts luy reprocher ses  
 crimes, en l'appellant *massacreur d'in-*  
*nocens, bouc puant, peste du monde, fu-*  
*rie d'Enfer*, & mille autres injures sem-  
 blables. Car ceux qu'il reconnut luy  
 avoir dit ces injures, il les fit precipi-  
 ter du haut des remparts de la ville,  
 & fit empaler inhumainement tous les  
 soldats de la garnison des Perles, qu'il  
 trouva dedans, n'épargnant seulement  
 qu'un Grand Seigneur nommé Isaac  
 l'Ange, à cause qu'il s'estoit opposé à

ceux qui luy disoient des injures , lequel luy succeda , comme nous verrons par la suite. Ayant depuis pris la ville de Pruse , il arracha la vie avec des cruautez inconcevables à tous ceux qui furent assez malheureux pour s'y trouver , & entre autres à vn jeune Prince nommé l'Ange Theodore , auquel après avoir fait crever les yeux , & l'avoit fait lier sur un asne , il le laissa aller vagabond par la campagne , iusqu'à ce que des Turcs l'ayant rencontré , l'emmenèrent , & le pensèrent charitablement. La ville de Lopade ne fut pas mieux traitée ; car si tost qu'il l'eut prise , il fit arracher les yeux à son Evesque , & fit pendre à des arbres grand nombre de ses citoyens. A l'imitation de l'Empereur Valens , il assembla beaucoup de devins , auxquels ayant demandé quelle seroit la premiere lettre du nom de son successeur , ils luy répondirent qu'il commenceroit par un I. cette prediction luy donna beaucoup de soucy , parce qu'en ce temps Isaac Comnene , petit fils de Manuel , s'estoit par artifice emparé de l'Isle de Cypre , d'où entrageant de ne

le pouvoit chasser, il s'en vengea par la mort du beau-frere d'une de ses putains qu'il fit cruellement massacrer; non content de cela, il fit encore mourir celuy qui avoit mis à mort ce dernier, avec deux freres, qui estoient tres-vaillans Capitaines, lesquels il fit tous pendre, montrant assez par là iusques à quel point il estoit capable de pousser sa cruauté. Au commencement de son Empire, il avoit relegué dans la Sythie Orientale son neveu Alexis Comnene, qui s'estant sauvé en Sicile, pria le Roy Guillaume de prendre les armes contre Andronic, pour venger la mort d'une infinité d'innocens, qu'il avoit sacrifiez à son inhumanité. Ce Roy touché de ses prieres, & qui d'un autre costé conservoit vne grande haine contre Andronic, depuis qu'il avoit fait mourir son predecesseur Alexis, luy declara la guerre, & quelque temps après s'empara de la Theffalonique; puis vint assieger la ville de Durazzo qu'il prit peu après. Andronic enragé de l'heureux succez des armes de Guillaume, fit brusler vif Alexis, bastard de Manuël, sous le

faux pretexte du crime de leze-Majesté, dont il l'accusoit : Enfin sa rage fut si grande, qu'il fit crever les yeux à Triplychus son favory. Cependant les Siciliens ayant mis en déroute son armée, vinrent mettre le siege devant Constantinople; ce qui arresta le cours de ses cruautéz, & le fit songer pour quelque temps à la conservation de son Empire & de ses sujets, faisant en certe rencontre ce qu'un bon Prince doit faire pour le bien de son peuple. Mais siflost que les Siciliens eurent levé le siege, il recommença mieux que iamais à exercer son inhumanité, qui enfin fut cause de sa perte; car ayant donné ordre à son Gladiateur Christophorite (homme qui estoit l'exécuteur ordinaire de ses cruels desseins) de faire mourir tous ceux qu'il croiroit assez puissans pour aspirer à l'Empire, & dont le nom commenceroit par un I. Christophorite executa ses ordres aussi tost, & fut dans les maisons de plusieurs Princes avec une troupe d'Archers leur oster miserablement la vie. Enfin estant allé chez Isaac l'Ange, dont nous avons parlé


cy-dessus ; Isaac ne l'eut pas plustost apperçû, que sçachant qu'il ne venoit à autre dessein que de luy donner la mort, il se mit aussi-tost en défense, & bien qu'il fût teste nuë, & qu'il eust un habit fort leger, il monta sur un cheval, puis le cimenterre à la main il courut sur Christophorite, qui le voyant sitost en défense, prit la fuite; mais Isaac le poursuivant à bride abatuë, luy déchargea un si grand coup de son cimenterre sur la teste, qu'il la luy fendit en deux; de plus se meslant parmy ses compagnons, il abbatit l'oreille à l'un, la teste à l'autre, & en se battant ainsi il se sauva dans la franchise du grand Temple, où le peuple le suivit en foule, pour sçavoir ce que c'estoit, estant déjà bien ravi d'avoir veu tomber Christophorite mort sur la place. Aussi-tost qu'il y fut entré il monta dans le poulpitre, (lieu élevé dans le Temple, où se mettoient ceux qui haranguoient) & exposa à tout le peuple le dessein de Christophorite, & pourquoy il l'avoit mis à mort; de sorte que le peuple ayant entendu Isaac, & de plus voyant

que l'Empereur avoit envoyé des gardes pour le tuer, il en massacra une grande partie, & le declara Empereur. De là la populace toute émeuë courut au Palais d'Andronic, qui la voyant venir, prit son arc & quelques fleches, qu'il décocha sur ceux qui approchoient trop près de la porte, qui fut peu de temps après enfoncée; ce qu'il n'eût pas plustost vû, qu'il arracha de colere une Croix d'or qu'il avoit au col, & la jeta par terre, puis fendant la presse, il tascha de se sauver, quoy qu'inutilement; car ayant esté arresté, on luy mit les fers aux pieds & aux mains. En suite dequoy les femmes se jetterent sur luy, & luy donnerent mille coups de poing. De plus après luy avoir crevé un œil, & coupé une main, on le mit sur un chameau nud en chemise, la teste couronnée d'oignons, & en ce pitoyable estat on le promena dans la grande place de Constantinople, où l'on l'attacha par les pieds à deux colonnes, qui furent dressées exprés. Ce fut en ce lieu, où le peuple luy cracha mille fois au nez;

l'un luy jetta de labouë sur la face, l'autre luy reprochoit ses cruelles actions. Ce fut aussi en cette place, où les vns luy ruoient des pierres, & les autres luy donnoient des soufflets. Enfin c'estoit grande pitié de voir sa barbe blanche toute salie de bouë, son visage couvert de crachats, son corps percé de coups d'épées, & de l'entendre dire d'une voix abbatuë & tremblante à ceux qui le traitoient ainsi; *Pourquoy ne cessez vous pas de briser le roseau qui est desia cassé?* Mais bien loin de leur faire compassion, ils luy deschirerent la chemise, & vn des plus animez luy donna plusieurs coups sur les parties honteuses; vn autre luy fourra vn estoc par la bouche iusques dans les boyaux, & vn Sicilien ayant tiré son épée, luy en perça les fesses. Enfin, ayant enduré tous ces tourmens sans se plaindre, comme s'il eust reconnu qu'il les avoit meritez, il dit en levant les yeux au Ciel, *O Seigneur, ayez pitié de moy.* En suite il prit de son sang dans sa main, & l'ayant sucçé, il rendit l'esprit, après avoir gouverné



l'Empire un an, onze mois, & vingt iours, l'an 1185. Ainsi mourut cruellement celuy dont la cruauté pendant sa vie, ne s'estoit pû assouvir du sang de tant d'innocens.



# ISAAC II.

SURNOMME' L'ANGE,

Empereur d'Orient.

*Ayant défait celuy qui me vouloit défaire,  
 Je m'emparay de son Estat :  
 Mais par un contre-sort en rachetant mon frere,  
 Je rachetay aussi celuy qui me l'osta.*

**I**L falloit que ce Prince fust grandement aimé de la fortune, pour en recevoir tant de faveurs, & pour pouvoir éviter des perils aussi pressans, que ceux qui le menacerent, tant en la prise de la ville de Nicée, où il se vit exposé comme les autres à la rage d'un Tyran tres-cruel, qu'en la mort de Christophorite, qui comme nous

1185.  
 Nicetas.  
 Rogerius